

Uhapšeni bili u kontaktu s Bosničem

Vještačenjem mobilnih telefona uhapšene osobe u akciji Damask utvrđeno je da su neki od njih imali telefonske kontakte sa Huseinom Bosničem, optuženim za javno podsticanje na terorističke aktivnosti, izjavio je jučer vještak za informatičku tehnologiju, inspektor Agencije za istrage i zaštitu BiH (SIPA) Irhad Kos, javlja Srna.

Kos je u Sudu BiH naveo da su pronašli Bosnićeve memorisani broj u telefonima uhapšenih Ibre Delića, Senada Hukića, Adema Karamuje i Elvira Muratovića.

On je naveo da je po naredbi Tužilaštva BiH radio i ekspertizu devet videomaterijala Bosnićevih hutbi, koje su bez zabrana tokom 2013. i 2014. bile postavljene na YouTubeu. Kos je rekao da nije ulazio u sadržaj tih snimaka, već je njegov zadatak bio da skine taj materijal sa interneta, pohrani ga i napravi njegov print-skrin. On je sudu objasnio način na koji je skidao zamrznute slike sa ekrana, te dodao da ne može sa sigurnošću tvrditi ko je objavio snimke.

Po okončanju Kosovog vještačenja, tužilac Dubravko Čampara uložio je materijalne dokaze, među kojima su i fotografije i videozapisi na kojima se nalazi optuženi Bosnić. Advokat Adil Lozo usprotivio se izvođenju tih dokaza, jer smatra da su nezakoniti. - Ti dokazi su najvjerojatnije nastali špijuniranjem ljudi koji idu u džamiju ili se okupljaju u privatnom ambijentu, izjavio je Lozo novinarima nakon ročišta.

Nastavak suđenja zakazan je za srijedu, 27. maja, kada će biti pušteni dijelovi snimaka hutbi i predavanja optuženog Bosnića.

